

San Pablo Tesalónica

vũ'ejoopo pa'inare jo'e

chũ'o tocha saosi'ea'me

Chũ'o saosi'ea'me

1 ¹ Chũ'ũ, Pablo, Silvanona'me Timoteo ija'ova utija'ova tocha saome mũsanũkonare Tesalónica vũ'ejoopo pa'inare Jesuni cuasajũ ũcuate'eũjakuanurũ pa'ijũ, mai Ja'kũ Diona'me Maire Paakũ Jesucristo'te ja'me pa'inare. ² Mai Ja'kũ Diona'me Maire Paakũ Jesucristoji mũsanũkona rekoñoña re'oja'che pa'iche'te cho'okaijũna re'oja'che pa'ijũ'ũ.

Cristo jo'e rairũmũna Dios pãi cu'ache pa'inare ro'iche chũ'ũja'mũ repana cu'ache cho'osi'e ro'i

³ Chũkũna majapãijana, mũsanũkona re'oja'che pa'iche'te cuasajũ Dioni si'arũmũ, “Re'orepamũ, Ja'kũ”, chiiche pa'imũ chũkũna'te. Jã'aja'ñe cho'oto re'omũ, mũsanũkonapi si'arũmũ Repaũni na'a rũa masi cuasajũ chekũnani na'a rũa oijũ re'oja'che cho'okaijũ pa'ijũna. ⁴ Jã'ajekũna chũkũna mũsanũkona Jesure masi cuasajũ pa'iche'te chekũchejũna pa'inani Jesucristo'te cuasakuanurũãre pojojũ kũame. Mũsanũkonapi rũa cu'ache ti'ljũecoijũnata'ni Repaũni ũcua cuasajũ re'oja'che pa'ijũ ñojũna kũame chũkũna. ⁵ Jã'aja'ñe masi cuasajũ ie masime mai: Pãi pa'iche cuasa ña ũcuarepa chũ'ũkũ'mũ Dios. Jã'ajekũna mũsanũkonare Repaũ chiiche'te cho'ojũ cu'ache cho'ocoijũnare, “Re'onaa'me ina”, chiiũ ũcuau pa'ichejana saja'mũ Repaũ.

⁶ Dios ũcuarepa chũ'ũkũjekũ maire cu'ache cho'ojũ pa'inare repana cu'ache cho'osi'e ro'ia'jũ chini sãiñe chũ'ũja'mũ. ⁷ Reparũmũ Maire Paakũ Jesús jo'e rairũmũ Diopi cho'okakũna mai cu'ache cho'ocoijũñeji si'asũna pani vajúsojanaa'me mai. Jesús Repaũ neena ángeles rũa masinana'me raijũ toana'me miañe ñoñe rajanaa'me. ⁸ Rani Dioni cuasacuhejũ Repaũ Jesús pa'iche kũachũ'ore jachajũ pa'inare vati toana saoja'mũ Repaũ,

repana jachasi'e ro'i. ⁹Vati toa Dios Peore Masiuji Re'okũ peochejajekũ re'oja'chejẽ'e peochejare ai saocojñosina si'arũmũ uujũ pa'ijanaa'me. ¹⁰Repau jo'e raiumucuse Jesús, Repau'te cuasanani Repau neenani pojocojñora chini re'oja'che ñou raija'mũ. Mũsanũkona ũcuachi'a chũkũna chũ'vachũ'o asa chẽa cuasanajeju Repau'te ja'me pojojanaa'me reparũmũ.

¹¹Jã'ajekũna mũsanũkonare mai Cuasaku'te Diore si'arũmũ sêekaiju pa'inaa'me chũkũna, mũsanũkonani Repau chẽa paanani ña, "Re'onaa'me ina", chiũ re'oja'chere ñsia'kũ chini. Ũcuachi'a Repau masicheji cho'okaiũna mũsanũkona re'oja'che cho'oũu chiiche'te peore cho'ojũ paaru chini sêekainaa'me chũkũna. Ũcuachi'a Jesuni cuasaju re'oja'che cho'omasia'ju chini sêekainaa'me chũkũna. ¹²Mũsanũkonapi jã'aja'ñe re'oja'che pa'ito Jesús Maire Paakũ jainũkore pã pojocojñoja'mũ. Ũcuachi'a Repauji mai Cuasakuji Diopi Maire Paakũ Jesucristona'me oiju cho'okaiũna mũsanũkonapi rua re'oja'che cho'o ñojũna pojoja'mũ Repau mũsanũkonare.

Maire Paakũ jo'e rajachere kũamũ

2 ¹⁻²Chũkũna majapãijana, chura Maire Paakũ Jesucristo jo'e rani maina'me pa'ijachere kũamũ chũ'u. Jã'ajekũna mũsanũkonare pãipi tĩĩne che'choju, "Maire Paakũ jo'e ranicuhasi'kua'mũ", chiito kũkũma'ñe jachajũ'u repanare, chiĩmũ chũ'u. Chekũrũmũ repana Dios chũ'o kũana-ja'ñe i'kaju jã'apãani chũ'ore ra kũaju jã'apãani utija'ovana chũ'o tocha sao, "Pablo tochasi'ea'me ie", chiijũ jorejanaa'me repana. ³Pãĩ mũsanũkonare jã'aja'ñe jorejũ i'kache jmakarũjẽ'e asamanẽjũ'u. Jesucristo jo'e rairũmũ ija'che pa'ija'mũ: Pãĩ jainũko Dioni jachajũ cu'ache cho'ojũ pa'irũmũna pãĩ chũ'ũkũ te'eu Cristo'te rua cuhekũji charo raija'mũ, cu'acheja ai saocojñojau. Repau raisirũmũna Jesucristo na'a cho'jepi jo'e raija'mũ. ⁴Repau charo raijau Diore rua cuhekũjekũ, repau'chi'a pojocojñora chini Diore cuasanare ũcuauũkore cuasaũsekũ cavakũ pãĩ ñajũ'te Dios vũ'e ujavũ'ena kaka rũũ, "Diorepau'mũ chũ'u", chiija'mũ.

⁵Chũ'u mũsanũkonare ja'me pa'irũmũ ũcuare kũasi'kua'mũ. ¿Jã'a cuasama'ñe mũsanũkona? ⁶Repau Cristo'te cuhekũ Diopi ũsekũna chuta'a raima'mũ. Repau Dios ũsemarũmũna raija'mũ Cristo'te cuhekũ. Chura jã'a masime mũsanũkona. ⁷Vati ai irũmũ rope'e chũ'ũkũ pa'imũ pãipi Dios chiiche'te cuheju cho'omaneajũ chini. Jã'ata'ni Diopi ũsekũna repau cho'ora chiiche peore cho'ocu'amũ. Dios Repau'te ũseamarũmũjatũ'ka vati cho'оче ũsekũ pa'ija'mũ. ⁸Dios ũsemarũmũpi vua pãĩũ vati ai neekũjekũ Cristo'te cuhekũji rua si'ache cho'o ñoja'mũ. Jã'ata'ni Maire Paakũ Jesús re'oja'che ñou rani repau cho'ochẽ'te ũsekũ i'kachechi'api vanisoja'mũ repau'te. ⁹Repau Maire Paakũ chuta'a raimarũmũ repau cu'ache pa'ikũ rani vati aipi cho'okaiũna rua masikũ Jesús saocojñosina cho'ochẽja'che pãijẽ'e cho'ovesũche'te si'ache jorekũ cho'oja'mũ. ¹⁰Ũcuachi'a

pāi vati toa saina repau joreku si'ache cu'ache cho'oche cuasajanaa'me, ūcuauṇi chini. Dios chu'o ūcuarepare asacuheju Jesure jovomanesinajeju vati toana sani cho'osojanaa'me repaṇa. ¹¹ Jā'ajekuna Dios repanare Repau chu'o asa chēañe ūsemu jorechu'ore cuasaa'ju chini. ¹² Jā'aja'ñe pa'ijū repaṇa cu'ache cho'oneñe'te jo'kasocuheju Repau chu'o ūcuarepare asacuhesinajeju ūcuauṇko vati toana sani cho'osojanaa'me repaṇa, cu'ache cho'osi'e ro'i.

**Repaṇa'me re'oja'che paaru chini Dios
chēacojñosina pa'iche'te kuamu**

¹³ Chukunata'ni musanukona re'oja'che pa'iche'te cuasajuna Dioni si'arumu, “Re'orepaṇu, Ja'ku”, chiiche pa'imū. Dios musanukonare Ūcuauṇ Rekochoji cho'okaiuna Jesuni cuasaju jovosina Repau neenajeju Ūcuauṇa'me ai re'oja'che paaru chini chēaasomu, Repau chuta'a chejajē'e cho'omarumu. ¹⁴ Musanukonapi chukuna chu'vachū'ore Jesucristo'te cuasache kuachū'ore asa chēa Repaṇi cuasaju jovo Maire Paaku Jesucristo pa'ichejare ai sani pa'ijū Ūcuauṇ pa'icheja'che re'oja'che paaru chini chēaasomu.

¹⁵ Jā'ajekuna, chukuna majapāijana, musanukona Jesure cuasache ūhasoma'ñe cuasaju chukuna sani chu'vasi'ena'me utija'opi tocha saojū che'chosi'e cavesuma'ñe cuasaju pa'ijū'ū. ¹⁶ Repau Maire Paaku Jesucristo mai Ja'ku Diona'me oiu cuhama'ñe re'oja'che cho'okaiū pa'iku'mū, maipi pojojū pa'ijū re'ojarekoñō paaa'ju chini. Ūcuachi'a maire Repau pa'icheja sani re'oja'che pa'ijache jo'kasi'kuamū, maipi repare cuasaju pojojū cha'aju paaru chini. ¹⁷ Ūcuauṇi musanukona rekoñōāna cho'okaau re'oja'che cho'o koka paaju pojojū i'kaju re'oja'chechi'a cho'ojū paaru chini.

Dioni sēekaaru chini Pablo i'kasi'ere kuamu

3 ¹ Chukuna majapāijana, Diore sēekaijū'ū, chukuna chu'vachū'ore pāipi ūcuauṇachejña pa'inapi na'mi asa chēa musanukona cho'osi'eja'che pojojū Jesuni cuasaju jovo'ju. ² Ūcuachi'a pāi cu'ache cho'onapi chukunani cu'ache cho'omanea'ju chijū sēekaijū'ū chukuna'te. Pāi ūcuarepanūko Diore cuasanachi'ama'me. ³ Jā'ata'ni Maire Paaku ūcuarepa cho'okujeku vati ai musanukonare cu'ache cho'oche ūseku cho'okaija'mū re'oja'che cho'o koka paaa'ju chini. ⁴ Ija'che cuasaju pa'ime chukuna: “Mai repanapi cho'oa'ju chini chū'ū jo'kasi'e Maire Paakuji cho'okaiuna irumu cho'ojū pa'icosome repaṇa. Ūcuachi'a na'a pa'isirumu cuhama'ñe ūcu cho'ojū pa'ijacosome”, chijū cuasame chukuna musanukonare. ⁵ Maire Paaku Jesucristoji cho'okaau musanukonare, Repau pa'icheja'che re'oja'che pa'imasijū cu'ache ti'jñetojē'e koka paaju Repaṇi cuhasoma'ñe ūcu cuasaju Dios pāi ña oicheja'che sāiñechi'a oijū re'oja'che cho'okaijū paaru chini.

Ñamema'ñe cho'oche cho'oju pa'iche'te kuamu

⁶ Asarepajũ'č, chukuna majapãijana. Maire Paaku Jesucristoji chũ'ukuna musanukonare ija'che chũ'č jo'kame chukuna: Mai majapãiu-ja'iu ũcuauakujı ñameku cho'oche cho'ocuhekujı chukuna che'chosi'e jachaku cho'oma'kure ja'me pa'imanejũ'č. ⁷ Chukuna musanukonare ja'me pa'irumu cho'oju pa'isi'eja'che cho'oma'to cu'amũ. Jã'a masime musanukona. Reparumu ñamema'ñe cho'oche cho'oju pa'isinaa'me chukuna. Musanukonare ũcuaja'che chukuna cho'osi'eja'che cho'oju pa'iche chiimu. ⁸ Reparumu chukuna, ãu chekuna nee ro'ima'ñe ãimanesinaa'me. Jã'aja'ñe cho'oma'ñe musanukonani te'eũ'terejẽ'e karache'te cho'ocuheju umucujñana'me ñami cho'oche cho'oju pa'isinaa'me chukuna. ⁹ Jã'ata'ni chukunapi musanukonani, “Kuirajũ'č chukuna'te”, chijũ sēni cu'are cho'omanera'asinaa'me. Ŭcu musanukonapi chukuna pa'iche'te ña chēa ũcuaja'che cho'oju paaru chini ñamema'ñe cho'oche'te cho'oju chukuna'te kuiraajũ chini sēmanesinaa'me. ¹⁰ Reparumupi vna ija'che chũ'ujũ pa'inaa'me chukuna: “Pãiu ñameku cho'oche cho'ocuheku ãu ãimanea'ku”, chiinaa'me chukuna.

¹¹ Musanukona pa'iche ija'che asaju pa'ime chukuna: Musanukona te'ena cho'oche jmamakarujẽ'e cho'oma'ñe ruu pa'iju ku'iju chekuna pa'iche'te ña cutuju pa'ijuasome. ¹² Jã'aja'ñe pa'inare Maire Paaku Jesucristo neenajejuna re'oja'che pa'iju cho'oche'te ñamema'ñe cho'oju repaare karache'te koo paaajũ chini chũ'ũnaa'me chukuna.

¹³ Chukuna majapãijana, musanukona re'oja'che cho'oche jmamakarujẽ'e cho'o ca'nasomanejũ'č. ¹⁴ Ija'ova utija'ova chukuna chũ'ujũ tocha saochē'te ũcuauanapi ña jachato repa pa'iche'te ña masi ja'me pa'imanejũ'č, kukuso re'oja'che paaru. ¹⁵ Jã'ata'ni repaare cuhemanajũ'č. Musanukona majapãijanare pe'kerũ i'kaju chũ'vajũ'č, repaare ũcuamakarũ jã'aja'ñe cho'oa'ju chini.

“Diopi re'oja'che cho'okaaũ”, chiiũ chu'o saosi'ea'me

¹⁶ Maire Paaku, re'oja'che pa'iche ĩsi Ai, Ŭcuauji ja'me pa'iu re'oja'che pa'iche si'ache rekoñõãna si'arumu cho'okaiũ paau musanukonare.

¹⁷ Chu'ũ Pablo, inukoru chu'o saochēchi'a chu'ũrepaui tochamu. Utija'o chu'ũ tocha saoja'o si'aja'oruã ija'chechi'a tochakũ'mũ chu'ũ. Ijamajña tochakũ'mũ chu'ũ. ¹⁸ Maire Paaku Jesucristoji musanukonare ũcuaukore re'oja'che cho'okaaũ. Re'omu.

Pablo